

Un ninón en la ventana – Sonián – Danielón

María José Girón

Edición 2008

Accésit poema

UN NINÓN EN LA VENTANA

De puntetas
al cabo una silla
fen equilibrios
un ninón en la ventana.

Ubre y cierra la maneta
estira los dedez
quiere tocar la lluna
y alzar-la en un papel.

Su mare frega los pllatos
el gato maula al huerto
el ninón en la ventana
ara estira tot el cuerpo.

Maula el gato
canta la mare
y ninguno el siente
cuan el ninón se cai.

La lluna no s'ha moviu
la mare encara no pllora
el ninón ya no respira
la suya carne está toba.

El gatet despierta el cocho
el cocho va a buscar a l'amo
y el ninón sonián con la lluna
ya la toca con la mano.

SONIÁN

Sonián
l'alma troba
los trocez que fan falta
pa fer lo que cal fer ta l'alma.

Si dexasem de soniar
se quedaría sin fer
y se'n irían
los trocez
y con ells
tot los que mos dar soniar:

pensar que é posible
lo que no lo é pas.

DANIELÓN

Danielón
va venir ta casa
l'última vez
sonian que feba teatro.

Dimpués
va saltar al tren
el aire en la piel
sonián el suyo descanso.

Concurso de relatos y poemas en aragonés ribagorzano
CONDAU DE RIBAGORZA
Ayuntamientos de Estadilla, Fonz y Graus

Cuan tornes, Danielón,
la mesa ya estará puesta,
las costillas al fuego
y tía Julia en la puerta.

La grasa del jamón
que te sabeba tan buena
se te desfará en la boca
como si fuese ternera.

N´hi habrá esquerola y conejo,
ajaceite y caragols,
garrapiñadas de postre
y clarete en el porrón.

No mos habrem fecho grans
ni caldrá pedir perdón
si alguno rute en la mesa
perque encara sem ninons.